

## **REZOLUCIJA** **o ostvarivanju programskih načela i opredjeljenja SDP BiH**

Polazeći od činjenice

da je SDP BiH pobjednik Općih izbora u BiH 2010. godine,

da smo ostvarili najbolji izborni rezultat od osamostaljenja BiH,

da smo implementacijom izbornih rezultata postali okosnica zakonodavne i izvršne vlasti, sa pet premijera kantonalnih i premijerom Vlade FBiH,

da trinaest mjeseci nakon izbora nije formirana Vlast na nivou BiH,

a u cilju ostvarivanja programskih opredjeljenja i ispoljavanja odgovornosti za funkcionisanje zakonodavne i izvršne vlasti,

Kongres SDP BiH dana 29.10.2011.godine

**d o n o s i**

### **Rezoluciju** **o ostvarivanju programskih načela i opredjeljenja SDP BiH**

1. SDP BiH potvrđuje svoju opredijeljenost da se kao dio vlasti maksimalno zalaže za realizaciju svoje programske vizije izgradnje bosanskohercegovačkog društva zasnovanog na slobodi, socijalnoj pravdi, jednakosti, solidarnosti i izgradnji BiH kao etnički nedjeljive, ekonomski prosperitetne i demokratske države.

2. Za ostvarivanje ove vizije SDP BiH je bespogovorno spreman na upornu i tešku borbu protiv svih nosilaca koncepata isključivosti, segregacije, diskriminacije, nepravde i ugrožavanja sloboda, istovremeno djelujući odlučno u pravcu smirivanja i prevazilaženja konflikata i podjela na nacionalnoj, teritorijalnoj, ekonomskoj ili bilo kojoj drugoj osnovi.

3. Izborni rezultati i njihova implementacija obavezuju sve organe, interesne oblike organizovanja i članove SDP BiH da brzim i jasnim političkim odgovorima na aktuelna društvena pitanja i probleme daju jasne smjernice svim članovima SDP BiH, a posebno onim u zakonodavnim i izvršnim organima vlasti kako bi u skladu sa utvrđenim politikama odlučujuće utjecali na neophodne i obećane društvene promjene i transformacije bosanskohercegovačkog društva na socijaldemokratskim osnovama poštujući demokratska pravila djelovanja unutar parlamentarnog sustava u BiH.

4. Načela iz Programa Socijaldemokratske partije, implementacija „5 politika“, kao i Platforme za formiranje vlasti i drugih međustranačkih dogovora, prioritetne su vodilje u radu kadrova koji u ime SDP-a obavljaju funkcije u izvršnoj i zakonodavnoj vlasti na svim nivoima.

5. Predizborna obećanja i programska načela SDP BiH maksimalno obavezuju i povećavaju ličnu odgovornost izabranih i imenovanih članova SDP BiH u organe vlasti prema čovjeku, državi, socijaldemokratskoj ideji, prema SDP BiH kao jedinstvenoj političkoj organizaciji.

6. Članovi SDP BiH u organima vlasti moraju biti snaga koja pokreće, mijenja i razvija, snaga koja ujedinjuje i koja je brana stihiji i prisutnim dezintegracijama. **Vrijeme u kojem živimo zahtjeva od svih nas još veća odricanja i jačanje svijesti o nužnosti i urgentnosti promjena, posebno kada je riječ o razvoju kritičko-kreativne misli zasnovane na Programu SDP BiH, obrazovanju i političkoj pismenosti članstva.**

7. Vlade u kojima učestvuje SDP moraju jednako tretirati sva područja u teritorijalnim jedinicama u kojima obnašaju vlast i sve građane koji u njima žive, ne praveći diskriminaciju po osnovu toga gdje je podrška SDP-u bila značajnije izražena. **Kongres poziva sve SDP-ove kadrove u vladama na svim nivoima da u**

**svom djelovanju posebno obrate pažnju na položaj nerazvijenih i ekonomski teško održivih jedinica lokalne samouprave.**

**8. SDP BiH se zalaže za stalno jačanje jedinica lokalne samouprave u skladu sa Evropskom poveljom o lokalnoj samoupravi“**

9. Uspostavljene neizbježne i neophodne programske koalicije sa drugim političkim partijama radi formiranja vlasti, kao i saradnja sa drugim političkim partijama pri obnašanju vlasti ne može i ne smije dovesti u pitanje programsku orijentaciju SDP BiH. Svima mora biti jasno da je SDP BiH konzistentan i vjeran svojim temeljnim programskim načelima i opredjeljenjima kao zrela stranka ljevice.

10. Odgovornost koju je SDP BiH preuzeo ulaskom u vlast imperativno zahtijeva da članovi organi i organizacije SDP BiH što hitnije prevladaju navike i načine dugogodišnjeg opozicionog mišljenja, rada i djelovanja, te počnu djelovati i ponašati se kao vlast koja ima jasne ciljeve i programe svoga rada i djelovanja.

11. Neophodno je i dalje jačati SDP BiH kao multietničku partiju cijele BiH kako bi bila dovoljno jaka, organizovana i spremna da djeluje na cijelom prostoru BiH. Zato su neophodni dodatni naponi za organizaciono i kadrovsko jačanje i postizanje boljih izbornih rezultata SDP BiH na prostoru Republike Srpske i kantonima u Federaciji sa hrvatskom većinom.

12. Za dalji razvoj i modernizaciju SDP BiH neophodno je preispitati radno angažovanje uposlenika SDP BiH, postojeću organizaciju, metode, sadržaje i načine rada i djelovanja organizacionih dijelova SDP BiH, a posebno rad i djelovanje izabranih i imenovanih članova SDP BiH u zakonodavnim i izvršnim organima vlasti, ali i svih kadrova koji su u ime SDP BiH angažovani u upravnim, nadzornim odborima ili upravama javnih preduzeća, institucija ili ustanova. Niko ko u ime SDP-a obnaša svoj mandat nije nezamjenjiv i za svoj rad dužan je snositi odgovornost pred zakonom, ali i političku odgovornost pred organima partije.

13. Glavni odbor SDP BiH i odbori na odgovarajućem nivou će po ovlaštenju Kongresa pristupiti analizi rada i aktivnosti svojih članova, te u cilju daljnjeg jačanja, razvoja i modernizacije i većeg angažmana svojih članova izvršiti promjenu pasiviziranih članova koji iz bilo kojeg razloga nisu u situaciji da se odgovarajuće angažiraju kao članovi tih organa.

14. Kao opozicionu partiju birači su nas prepoznavali i cijenili po onome što smo kritikovali, predlagali, nudili moguće promjene. Sada će nas cijeniti po onome što i kako radimo, kakve rezultate postizemo i kako ispunjavamo predizborna obećanja.

15. Izjašnjavanje delegata Kongresa o povjerenju organima SDP BiH, Predsjedniku, Glavnom i Nadzornom odboru, te jasno opredjeljenje kako će se sljedeći redovni Kongres održati nakon Općih izbora u BiH, stvara potrebne pretpostavke za miran i planski rad naših predstavnika u organima vlasti, te potpuno fokusiranje na provođenju SDP-ovih politika i obećanih promjena.

16. Kongres izražava podršku svim vladama koje predvodi i u kojima participira SDP BiH.

17. Po uzoru na Kongres, kantonalne i regionalne organizacije će do kraja godine održati Izvještajne konferencije koje bi trebale rezultirati daljim povećanim angažmanom članova, odnosno, tamo gdje ocjene da je potrebno, kadrovskim promjenama sa ciljem daljnjeg organizacionog jačanja SDP BiH na svim nivoima. **Na predstojećim kantonalnim i regionalnim konferencijama treba definisati osnove ciljeva u provođenju lokalnih izbora 2012. sa ciljem ojačanja duha pobjede i mobilizacije članstva.**

18. Članovi i organi SDP BiH na svim nivoima obavezni su provoditi sve rezolucije Kongresa SDP BiH.

Usvajajući ovu rezoluciju, Kongres zaključuje:

- da Predsjedništvo i Glavni odbor SDP BiH razradi konkretan Program razvoja i djelovanja SDP BiH na prostoru Republike Srpske i kantonima sa hrvatskom većinom,

- **da Predsjedništvo i Glavni odbor SDP BiH utvrde konkretne planove i aktivnosti za realizaciju opredjeljenja utvrđenih rezolucijama 2. Vanrednog kongresa SDP BiH,**
- da Predsjedništvo SDP BiH uradi konkretan plan i uputstvo za rad i djelovanje izabranih i imenovanih kadrova u ime SDP BiH u organizacijama SDP BiH, izbornim jedinicima iz kojih dolaze i SDP BiH, kao i radno angažovanje uposlenika SDP BiH uz izmjene i dopune Standarda i normativa koje je usvojio Glavni odbor SDP BiH,
- **da je nužno pristupiti izmjenama propisa, kadrovskom osposobljavanju organa državne uprave, rukovodstava i uprava javnih ustanova, javnih preduzeća i preduzeća u većinskom državnom vlasništvu s ciljem efikasnog sprovođenja reformi koje očekuju Bosnu i Hercegovinu u procesu Evroatlanskih integracija,**
- da Predsjedništvo i Glavni odbor SDP BiH izrade plan mjera i aktivnosti održivog povratka u BiH, a pogotovo na prostor Republike Srpske BiH,
- **da je obaveza svih kadrova izabranih ili imenovanih u ime SDP BiH da pri obavljanju povjerenim ih poslova slijede moralna načela utemeljena u ideji socijaldemokratije i borbe protiv svih vidova korupcije,**
- da svi organi SDP BiH odmah poslije Kongresa započnu sa organizovanim i temeljitim pripremama za Općinske izbore u BiH 2012. godine na isti način i približno jednakom snagom kao za Opće izbore 2010. godine.